



## La acule de Patrie e svole sul Stadi Friül

**Un ricognossiment speciâl de ARLeF ae coreografie creade de Curve Nord in ocasion de partide dai 7 di Avrîl**



Ae ARLeF no i è scjampade la coreografie che i tifôs de Curve Nord dal Udin a àn organizât tal Stadi Friül in ocasion de partide cul Empoli dai 7 di Avrîl passâts (zornade che propit a Gurize si fasevin lis celebracions uficiâls de Fieste de Patrie dal Friül) e vinçude dai blancs e neris cul risultât final combatût di 3 a 2. E nol podeve che jessi cussì, stant che e je stade disrodolade e animade une acule zale fate di trê draps distints, simbul storic de Patrie dal Friül, suntun mâr di têt blu, cuntune scrite par furlan in ricuart de nassite dal stât patriarcjâl ai 3 di Avrîl dal 1077, par une superficie di plui di 320 metris cuadrîs. Ducj i 5.000 tifôs de Curve Nord a jerin stâts mobilitâts dal grup dai Ultras 1995, coordinâts di Carlo Urli.

«Pe ocasion, si sin ispirâts a di une coreografie simile che a so timp e jere stade organizade dai tifôs gjenoans, cul lôr variül. Une ventine di personis dal grup si son metudis sot, lavorant par 10 dis di file, e otignint ae fin - cu la colaborazion di dute la curve - un risultât spettacolâr. O volevin fâ une sorprese ae scuadre e ai tifôs, proponint alc di diferent, e mi pâr che o vin rivât adore a fâlu», al sclaris Carlo Urli.

### Ma ce isal e ce fasial il vuestri grup?

Cemût che al dis il non, o sin nassûts intal 1995 e o fasin riferiment ae culture dal moviment ultras che al unis dutis lis scuadris talianis. Al grup a fasin riferiment une otantine di tifôs di dute la region, di dutis lis etâts, oms e feminis. O sin unîts de amicizie tra di nô e de passion pe nestre scuadre, e stâ insiemî nus fâs pardabon plasê, ancje di là dai risultâts sportîfs che i zuiadôrs a concuistin sul cjamp.

### Passion a 360 grâts, duncje?

Sigûr. L'Udin al è une des bandieris de nestre tiere e nô o sin braurôs di apartignî a di chê. La lenghe plui fevelade tra nô al è il furlan e ogni ocasion e je buine par fâle

cognossi viazant ator pe Italie e pe Europe (in chei bie tîmps che l'Udin al passave di là des Alps pes sôs sfidis continentâls...). O cjapin dentri in particolâr i zovins par mostrâur trop che al sedi impuartant coltivâ lis nestris lidris.

### E in Curve, cemût si esprimie cheste passion?

O proponin dispès coreografîs che a fasin riferiment al nestri teritori. Trê agns indaûr, par esempli, in ocasion dai 40 agns dal taramot dal 1976, o vin preparât un strisson lunc par ricuardâ chel avigniment tragjic, acompagnât di une maree di cartoncins colorâts.

### Dilunc de partide cul Empoli, però, o vês tocjât il cûr di ducj i furlans, tifôs o no, e alore o sês stâts premiâts ancje de ARLeF.

Si, al è vèr. O jerin ancje tant ingusits de improvizazion di puartâ la nestre bandiere tal Stadi Friül inte ocasion precedente de partide de scuadre nazionâl di balon. Ancje par chist, la Curve e à rispindût in grant, e tancj altris tifôs si son presentâts tal stadi cu la bandiere de Patrie dal Friül su lis spalis. Chel che o vevin iniment, ae fin, nus è vignût fûr ben e al è plasût. Finide la partide, tancj tifôs nus àn fermât par fânus i compliments e cualchidun al veve fintremai lis lagrimis tai voi. Il ricognossiment simbolic de Agenzie Regjonâl pe Lenghe Furlane, consegnât dilunc di une cerimonie par rimarcâ la nestre braûre di apartignince al Friül e ae sô lenghe, e je stade la cjariesute su la torte.

### Chest ricognossiment coventariaal tant che quartefortune? L'Udin restariaal in serie A?

Jo o crôt propit di si.

Adriano Del Fabro

